

Bosna i Hercegovina  
Federacija Bosne i Hercegovine  
Hercegovačko-neretvanska županija-kanton  
**SKUPŠTINA**

Broj: 02-01-XXII-349/16  
Mostar, 16.12.2016. godine

**IZVOD IZ ZAPISNIKA**  
sa dvadeset druge(XXII) sjednice Skupštine  
Hercegovačko-neretvanske županije-kantona

Sjednica je održana 16.12.2016. godine u sali Skupštine HNŽ/K u Mostaru s početkom u 13:00 sati.

Sjednicu je otvorio predsjedavajući Skupštine Šerif Špago i pozdravio prisutne. Sekretar Skupštine, Željka Čule obavila je prozivku.

**Nazočni:** Zoran Krešić, Stana Burić, Osman Čatić, Mesud Džajić, Ramiz Fajić, Luka Faletar, Andrea Pehar, Tomislav Martinović, Zijat Mušić, Ante Pavličević, Đuro Prkačin, Dario Pušić, Zoran Raič, Vesna Saradžić, Elmir Šator, Amir Šelo, Ajman Šoše, Šerif Špago, Ana-Marija Tadić-Jakovljević, Drago Tule, Amer Zagorčić, Osman Macić, Ivona Raguž, Zlatko Hadžiomerović.

**Izočni:** Boris Bošnjak, Anel Kljako, Davor Pehar, Adnan Velagić i Aner Žuljević.

Konstatirano je da je na sjednici prisutno **25** zastpnika, te da postoji kvorum za rad i pravosnažno odlučivanje.

Sjednici je naknadno pristupio Aner Žuljević.

Sjednica je javna, snimana je i snimci su sastavni dio ovog Izvoda iz zapisnika.

Predsjedavajući otvara raspravu o Prijedlogu dnevnog reda.

Nitko se nije javio za riječ.

Prije glasanja o dnevnom redu, Skupština poslovnički mora odobriti da se o točki 3. predloženog dnevnog reda, Prijedlog Zakona o izmjenama Zakona o upravnim taksama sa tarifom upravnih taksi HNŽ/K, raspravlja po skraćenoj proceduri.

Usljedilo je glasovanje

Većinom glasova Skupština je usvojila da se navedeni Zakon raspravlja po skraćenoj proceduri, uz 3 glasa suzdržana.

Predloženi dnevni red:

1. Zastupnička pitanja;
2. Nacrt Prostornog plana HNŽ/K za period od 2012. do 2022. godine;
3. Prijedlog Zakona o izmjenama Zakona o administrativnim taksama sa tarifom administrativnih taksi HNŽ/K (skraćeni postupak);
4. Prijedlog Zakona o izmjenama i dopunama Zakona o poljoprivrednom zemljištu HNŽ/K;
5. Prijedlog Zakona o izmjenama Zakona o načinu označavanja i evidentiranja naseljenih mjesta, ulica, trgova i kućnih brojeva;
6. Nacrt Zakona o zaštiti obitelji s djecom;
7. Nacrt Zakona o obrazovanju odraslih HNŽ/K;
8. Nacrt Zakona o zaštiti prirode;

9. Odluka o osnivanju Komisije za pitanje branitelja Skupštine HNŽ/K;
10. Odluka o osnivanju Komisije za europske integracije Skupštine HNŽ/K.

Usljedilo je glasovanje.

Prijedlog dnevnog reda je jednoglasno usvojen.

Usvojeni dnevni red.

1. Zastupnička pitanja;
2. Nacrt Prostornog plana HNŽ/K za period od 2012. do 2022. godine;
3. Prijedlog Zakona o izmjenama Zakona o administrativnim taksama sa tarifom administrativnih taksi HNŽ/K (skraćeni postupak);
4. Prijedlog Zakona o izmjenama i dopunama Zakona o poljoprivrednom zemljištu HNŽ/K;
5. Prijedlog Zakona o izmjenama Zakona o načinu označavanja i evidentiranja naseljenih mjesta, ulica, trgova i kućnih brojeva;
6. Nacrt Zakona o zaštiti Obitelji s djecom;
7. Nacrt Zakona o obrazovanju odraslih HNŽ/K;
8. Nacrt Zakona o zaštiti prirode;
9. Odluka o osnivanju Komisije za pitanje branitelja Skupštine HNŽ/K;
10. Odluka o osnivanju Komisije za europske integracije Skupštine HNŽ/K.

Usljedilo je glasanje o Izvodu iz zapisnika s 20. i 21. sjednice Skupštine HNŽ/K.

Nakon glasanja konstatirano je da su Izvodi iz zapisnika s 20. i 21. sjednice Skupštine jednoglasno usvojeni.

#### **AD1. Zastupnička pitanja**

Zastupnik Amer Zagorčić

Prvo pitanje je, ustvari inicijativa je, imam inicijativu i dva pitanja ministarstvu unutrašnjih poslova. Dakle, imajući u vidu da se praktično na istom mjestu posljednih godina desilo niz saobraćajnih nesreća sa smrtnim ishodom, mahom mladih ljudi, ovim putem Ministarstvu unutrašnjih poslova HNK upućujem inicijativu da se na lokaciji Jelačića podrum na putu Blagaj-Mostar, postavi stacionarni foto-radar, a sa ciljem prevencije nesreća i spašavanja ljudskih života. Molim Vladu HNK da u narednoj godini osigura sredstva u budžetu za postavljanje ovog radara ili da dislocira neki od postojećih. Također u Gradu Mostaru i Ministarstvu saobraćaja HNK upućujem inicijativu, da se poboljša saobraćajna signalizacija na toj dionici, znakovi i slično. Uz inicijativu prilažem i potpise preko 400 građana sa tog područja koji su potpisali peticiju za postavljanje ovog radara. I molio bi Vladu HNK da mi pismeno do naredne sjednice dostavi informaciju i izjašnjenje o ovoj inicijativi, a koliko imam informaciju i neke nevladine organizacije su ministarstvu unutrašnjih poslova dostavile također inicijativu za ovaj radar. Ja mislim da je blizu 10-ak mladih života izgubljeno na istoj krivini, na istom mjestu, i da po tom pitanju učinimo nešto. Svjedoci smo da na Bulevaru u Mostaru nakon postavljanja radara drastično se smanjio broj saobraćajnih nesreća sa fatalnim ishodom i mislim da je to najmanje što možemo učiniti za ljude i za prevenciju takvih nemilih i nesretnih događaja.

Prvo, dakle, moje pitanje je Zavodu zdravstvenog osiguranja, kakva je struktura punjenja budžeta Zavoda zdravstvenog osiguranja HNK po opštinama, to jest koliko se na ime uplata zdravstvenog osiguranja uprihoduje iz svake opštine?

I drugo pitanje, pod kojim uslovima je Javno pravobranilaštvo HNK prešlo u nove prostorije i pod kojim uslovima je koristilo stare?

Zastupnik Ilija Cvitanović

Postavit ću dva, tri pitanja i jednu inicijativu koju sam već davno spominjao, a ona se odnosi na izravan prijenos zasjedanja skupština HNŽ budući da je u većini županija praksa da se sjednice prenose, da građani mogu čuti što tko radi i da taj rad dignemo na transparentniju razinu, ostao sam bez ikakvog odgovora, a budući da je vrijeme izrade proračuna i budući da u proračunu se uvijek nađu sredstva za medije, predlažem, sugeriram, da razmislite o tome da sve lokalne radio postaje i radio postaja Herceg-Bosne koju financiramo iz ovog proračuna, prenosi uživo sve sjednice skupštine HNŽ. To je inicijativa koju ću dostaviti tajništvu pismeno, iako sam je već jedanput dostavio prije nekoliko mjeseci.

Drugo, pitanje, ministru poljoprivrede, ne vidim ga ovdje. Pitanje postavljam ministarstvu poljoprivrede, koliko će po rebalansu proračuna, koji je Vlada nedavno usvojila, sredstava biti izdvojeno za poljoprivrednu djelatnost u našoj županiji? Po informacijama koje ja imam, da ih uopće nema, ako ih ima kako su raspoređena? Gledao sam emisiju na televiziji u kojoj je sudjelovao i ministar poljoprivrede, koji je inače u drugom mandatu i već 6 godina ministar i čovjek reče „treba uraditi analizu u šumarstvu“, nakon 6 godina se ne radi analiza već se zbog nemogućnosti rješavanja nagomilanih problema, za koje je vjerojatno i on odgovoran, podnese ostavka i da se prigoda nekome drugom da može raditi. A pitanje se odnosi, koliko će sredstva biti realizirano za poticaje po rebalansu proračuna?

Sljedeće pitanje je upućeno ministru unutarnjih poslova i predsjedniku Vlade, a u skladu je i sa ovim dopisom koji smo dobili od sindikata policije o isplatama iz proračuna po sudskim presudama. Vrlo pompozno je također i ova priča oko nagodbi oko sudskih presuda najavljena na početku ove kalendarske godine, i zanima me koliko je isplaćeno tih sredstava, sa koliko onih koji su utužili po bilo kojem osnovu je dogovoreno da se odreknu kamata, a da im se isplati glavnica, to se odnosi na premijera? A drugi dio pitanja se odnosi na ministra unutarnjih poslova, zanima me tumačenje ovog pisma sindikata policije, na što se ovo točno odnosi, jeli moguće da se jednim isplaćuje po jednom kriteriju, da se drugima ne isplaćuje po istom kriteriju ili da im se uopće ne isplaćuje?

Još samo podpitanje ministru poljoprivrede, koliko je koncesija u ovoj godini izdano, dodijeljeno i koji su to koncesori?

Zastupnik Zlatko Hadžiomerović

Pokrećem tri inicijative. Jedna je inicijativa za odobravanje sredstava u budžetu Vlade HNK-a za 2017. godinu, predlažem Vladi HNK-a da u budžetu za 2017. godinu obezbjedi sredstva u iznosu od 300.000 KM za sufinansiranje i zapošljavanje djece šehida i poginulih boraca. Dio sredstava kao vid sufinansiranja djece će se zatražiti od Federalnog zavoda za zapošljavanje. Prema evidenciji koju imaju u ministarstvu za boračka pitanja takve djece ima 5.900. Naša je ljudska obaveza da iz godine u godinu izdvajamo navedena sredstva i pomognemo zapošljavanju ove populacije.

Druga je inicijativa za obezbjeđenje sredstva u budžetu za 2017. godinu za zapošljavanje asistenata u nastavi za djecu sa posebnim potrebama. S obzirom da škole takoreći svakodnevno iskazuju potrebu za angažovanjem asistenata u nastavi za djecu sa posebnim potrebama, u toku izvođenja redovne nastave učitelji i nastavnici nisu u mogućnosti pokloniti dovoljno pažnje takvoj djeci i pomoći im u njihovom uspješnijem obrazovanju, predlažem da se u budžetu HNK-a za 2017. godinu obezbjedi sredstva za upošljavanje asistenata u nastavi u iznosu od 200.000 KM, a ostatak sredstava bi zatražili kao vid sufinansiranja od kantonalnog i federalnog zavoda za zapošljavanje.

U trećoj inicijativi radi se o tome da Dom zdravlja Uzinovići već 16 godina egzistira u Stocu i pruža usluge povratnicima i ostalim kategorijama od 2000. godine, a lokalna vlast im ne dozvoljava da uđu u prostorije postojećeg doma zdravlja, tražim od Vlade HNK da hitno preuzme osnivačka prava Doma zdravlja Uzinovići i Doma zdravlja Šćipe u Prozoru. Dakle, to bi bilo najmanje moguće da se učini nešto za te ljude uposlenike. Moram ovo istaći, nađite mi ravnatelja ili direktora da se požalio na mene kad sam bio ministar, nađite mi ga da je jedan uposlenik ostao bez zaposlenja, ja sam se borio sa sindikatom, dvije godine dana komunicirao nisam od paljevine onih zgrada, nisam im dozvoljavao da mi uđu u kancelariju, ali sam se ja brinuo o tim uposlenicima, a sad vidite treba otpustiti nekih 30, 40 ili 50 ljudi na ulicu, što je vrlo nekorektno. Nađite rješenje, ima rješenje. I predlažem, prvo, da se Vlada zauzme da to postanu, dakle da Vlada bude osnivač, što može po zakonu tih institucija, do konačnog rješenja, ili dok se neko smiluje, ne znam. Dalje, dakle, isto govorim i za Dom zdravlja Uzinovići i za Dom zdravlja Šćipe, molim ministra Opsenicu da hitno stavi van snage rješenje kojim se obavještavaju Dom zdravlja Uzinovići i Dom zdravlja Šćipe da od 1. januara 2017. godine Zavod zdravstvenog osiguranja HNK neće s njima potpisati ugovor o pružanju usluge pacijentima. Ako već zvanična politika neda, onda molim vas dajte nam odobrite sredstva od 200.000 KM da mi počnemo kao diskriminirani dole, da počnemo raditi novu zgradu doma zdravlja, pa takmičiti ćemo se u dobru, nećemo u zlu, neće nam niko biti kriv, jeli sami ćemo se pokušati razvijati.

Zastupnik Dario Pušić

Koristim priliku da postavim zastupničko pitanje ministru prosvjete, znanosti, kulture i športa, kada možemo očekivati osnivanje Športskog saveza? Ovo se je pitanje već nekoliko puta postavljalo s ove govornice i ni jedan odgovor nismo dobili. Koliko imam informaciju, da je u prošlom sazivu već bilo sve spremno da se osnuje Športski savez, i evo ne znam u čemu je problem, volio bih da dobijemo konkretan odgovor ovdje jednom, te pokrećem inicijativu prema kolegiju Skupštine, da u prvom tromjesečju 2017. godine održi tematsku sjednicu problematika športa u HNŽ-a.

Zastupnik Stana Burić

Dolazim iz općine Ravno, većina vas zna njezin zemljopisni položaj, ali sam sigurna da većina vas ne zna da smo jedina općina u F BiH koja nema svoju policijsku stanicu. Funkcioniramo po principu policijske ispostave Neum, znači dvije policijske ispostave, jedna u Ravnom, druga na Ivanjici, u smjenama radi u Ravnom 1 policajac, na Ivanjici se tjedno mijenjaju 2 policajca, mislim da to takva sigurnost nije zabilježena ni u Bangladešu. Tu je bilo dosta provala, krađa, ništa nije riješeno, znači svi dosadašnji problemi se stavljaju pod tepih. Kad sam zatražila od županije informaciju, dobila sam obavijest da ovdje u ovoj našoj županiji fali 200 policajaca, a znam da je bio natječaj za nove kadete, pa me zanima imenom i prezimenom, tko je odgovoran zašto ti momci nisu primljeni, zašto nisu dobili svoja radna mjesta, zašto je ovako ugrožena sigurnost i tko će za to preuzeti odgovornost imenom i prezimenom? Zanima me također zašto ne postoji, zašto se ne uspostavlja policijska stanica Ravno i tko je za to isto odgovoran imenom i prezimenom? Ova tri pitanja, znači šta je sa raspisanim natječajem, zašto nije, a nemojte mi odgovarati molim vas samo da nije formiran policijski odbor, jer to svi znamo, pa me zanima zašto nije formiran policijski odbor, i to imenom i prezimenom?

Pitanje se upućuje Ministarstvu unutrašnjih poslova.

Zastupnik Zijat-Zijo Mušić

Tražim od ministra za boračka pitanja da konačno dođemo do registra po zakonu o dopunskim pravima boraca, ja dobivam prepiske, znate šta je ovdje problem, ja bi volio da nisam dobio nikakav papir već da mi se nešto objašnjava ako se to napravi kako treba tražiti saglasnost od Agencije za zaštitu dokumenata, pa u nacrtu mišljenje, itd., pa ja sam tražio to da mi se odgovori na poslaničko pitanje i dobijemo registar, a sva ova procedura koja je bila upućena trebala je bit upućena baš od strane tog ministarstva, a meni se sve obrazlaže šta se sve trebalo uraditi!? Evo sad da malo pojasnim pitanje. Ako je ta procedura, doći ćemo mi do nje jer se mora doći, mislim da to radi i Federacija i ne znam što bježimo, može meni kao poslaniku, nema potrebe za bojaznost od zaštite podataka kao poslaniku, mi to plaćamo, mi odobravamo sredstva, sad ćemo imat ponovo neka sredstva koja će se objaviti javnim pozivom i taj javni poziv će podijelit određeni broj sredstava po raznim osnovama i nismo u stanju tu, čuj sad treba zaštita podataka, da ne dobijemo te podatke!? Možda objavljivanje konačnog registra možda traži neku zaštitu podataka, ja ne tražim to, ja kao poslanik i u ime, dobit će i svi ostali poslanici, mislim da ministar može na to odgovorit, ponavljam ponovo pitanje da dobijem taj registar. Znači izdržat ću ja na ovom ponavljanju pitanja dok ne dođemo do registra, to je jedno.

I drugo moje poslaničko pitanje, zajedno sa kolegom Čatićem bilo je upućeno prema Vladi i svim ministarstvima, ustanovama i svemu onom što pripada u Vladu HNK-a, ja dobijem odgovor, vjerovatno su se dogovorili to, ne odgovor, dobijem mišljenje od ministra finansija, na pitanje se treba dobit odgovor, ne mišljenje, ja znam šta se misli, ali ja tražim odgovor na pitanje. I onda mi kaže tamo da pretpostavlja da sve ove odluke se donose po odluci Vlade, i to znam, ubija mi inteligenciju, i znam da se oni svi slažu u stručnoj službi Vlade, i to ja znam, ali na kraju nije, meni treba odgovor na pitanje koje sam postavio, jasan, tačno piše sva rješenja o preraspodjeli sredstava u budžetu HNK-a, bilo ko da je uradio to, jeli to geodetski zavod ili bilo ko, evo da ne govorim, to je jasno i nalaze se ta rješenja u stručnim službama i meni se samo kaže da se ona nalaze tu.

Nevenko Herceg, predsjednik Vlade HNŽ/K, javio se za riječ.

Zastupnica Vesna Saradžić

Upućujem pitanje ministarstvu unutrašnjih poslova, interesuje me dali se poduzimaju ikakve aktivnosti na sprječavanju nelegalne prodaje i distribucije pirotehničkih sredstava, kao i sprječavanju njihove nezakonite upotrebe, posebno kada su djeca u pitanju?

Drugo moje pitanje upućujem ministarstvu trgovine, turizma i zaštite okoline, interesuje me dali su poduzete ili se poduzimaju aktivnosti vezano za uspostavljanje informacionog sistema u oblasti upravljanja otpadom na kantonalnom nivou, a koji treba biti u skladu sa donesenim strateškim dokumentima Parlamenta F BiH i Vlade F BiH, odnosno sa direktivama Evropske Unije? U slučaju da je odgovor negativan, iskoristit ću ovu priliku i uputiti inicijativu vezano za pokretanje navedenih aktivnosti.

Zastupnik Elmir Šator

Upućujem inicijativu da Upravni odbor Zavoda zdravstvenog osiguranja, a imam informaciju da su već donijeli finansijski plan za iduću godinu, ostane pri istom za narednu godinu, nisam siguran da ministar zdravstva može donijeti takvu odluku samostalno bez potvrde Vlade.

Zastupnik Ajman Šoš

Imam jedno pitanje za ministarstvo poljoprivrede, vodoprivrede i šumarstva, pošto sam isto pitanje postavio prije otprilike 10-ak mjeseci, a odnosilo se na dodjelu koncesija za uzgoj ribe, pa sam tada u odgovoru dobio da je potrebna neka izrada studije i da se očekuje da će to biti urađeno u drugoj polovici 2016. godine, ali evo do danas nisam primjetio da se išta dešava, pa zato pitam zašto do danas ništa nije urađeno po ovom pitanju i ako jeste da me o tome informišete.

Zastupnik Aner Žuljević

Imam poslaničko pitanje prema ministarstvu unutrašnjih poslova, koliko postoji predmeta na čekanju zbog činjenice da ne postoje formirani odgovarajući organi unutar MUP-a HNK-a? Drugo pitanje postavljam Zavodu zdravstvenog osiguranja, zašto se vikendom ne može izdati recept za esencijalnu listu?

Zastupnik Osman Čatić

Inicijativa je upućena Ministarstvu obrazovanja, nauke, kulture i sporta, da formira komisiju sastavljenu od inspektora obrazovanja, savjetnika u obrazovanju, koji bi predložili mjere i aktivnosti koje će uticati na smanjenje težine dačke torbe.

I drugo poslaničko pitanje, upućeno Ministarstvu finansija, koliko ukupno prihodujemo sredstava po osnovu svih koncesijskih naknada na području kantona i u 2015. i u ovom periodu evo prvih 11 mjeseci 2016. godine?

Tomislav Martinović se javlja za riječ.

Predsjedavajući zaključuje raspravu.

## **AD2. Nacrt Prostornog plana HNŽ/K za period od 2012. do 2022. godine**

U ime predlagatelja Nacrta Prostornog plana HNŽ/K za period od 2012. do 2022. godine, obrazloženje je dao Suad Hasandedić, ministar Ministarstva građenja i prostornog uređenja HNŽ/K, Jaroslav Vego, Sadeta Džiho, Dževad Čohadžić i Simona Čavar ispred Zavoda za prostorno planiranje i zaštitu okoliša HNŽ/K.

Predsjedavajući je otvorio raspravu.

U raspravi su učestvovali: Dario Pušić, Ramiz Fajić, Vesna Saradžić, Osman Macić.

Poslanik Dario Pušić predlaže da se uz buduću južnu obilaznicu Grada Mostara, na magistralnom putu M-61, od mjesta Varda do mjesta Međine, označi industrijskom zonom.

Također, postavlja pitanje, pošto je naznačeno u Prostornom planu da je u mjestu Tomuša u Kruševu boznačeno minsko polje, postoje li ozbiljne sumnje da je baš tu minsko polje, jer mještani Kruševa često koriste to područje i pješače tim dijelom, otkud te informacije.

Poslanik Ramiz Fajić predlaže da se na karti 5, saobraćajna infrastruktura, šematski prikaz trase koridora 5C briše do konačnog usvajanja Prostornog plana koridora 5C od posebnog značaja za F BiH.

Vesna Saradžić predlaže da se zbog obimnosti dokumenta poslanicima ostavi više vremena za ažuriranje informacija, da se omogući poslanicima da u roku od 30 dana dostave svoje primjedbe i sugestije, te da se omogući javna rasprava u trajanju 90 dana.

Predsjedavajući zaključuje raspravu uz jednu dopunu, prilogu materijala poslanici su greškom dobili Prijedlog Odluke o usvajanju Nacrta Prostornog plana, po Poslovniku

Skupštine i po Odluci o izradi Prostornog plana HNŽ/K-a svi dokumenti u formi nacrtu se usvajaju zaključkom.

Predsjedavajući predlaže zaključak:

„Prihvata se Nacrt Prostornog plana HNŽ/K za period od 2012. do 2022. godine kao dobra osnova za izradu Prijedloga Prostornog plana HNŽ/K.

Primjedbe, prijedlozi i mišljenja izneseni na raspravi dostavit će se nosiocu izrade Prostornog plana da ih razmotri i eventualno uzme u obzir pri izradi Prijedloga Prostornog plana.

Nosioc izrade dužan je Nacrt Prostornog plana HNŽ/K staviti na javnu raspravu, u skladu sa Odlukom o pristupanju izradi Prostornog plana HNŽ/K za period od 2012. do 2022. godine.

Zaključak stupa na snagu danu donošenja, a objavit će se u Narodnim novinama HNŽ/K.“

Predsjedavajući napominje da će po ovom pitanju biti organizovana javna rasprava gdje svaki poslanik i druga zainteresovana lica mogu davati prijedloge, mišljenja i primjedbe.

Usljedilo je glasanje za prijedlog zaključka.

Predsjedavajući konstatuje da je zaključak jednoglasno usvojen.

Zbog trenutne odsutnosti ministra Rašida Hadžovića, došlo je do zamjene tačke 3. dnevnog reda sa tačkom 4. dnevnog reda.

#### **AD4. Prijedlog Zakona o izmjenama i dopunama Zakona o poljoprivrednom zemljištu HNŽ/K**

U ime predlagatelja Prijedlog Zakona o izmjenama i dopunama Zakona o poljoprivrednom zemljištu HNŽ/K obrazloženje je dao Donko Jović, ministar Ministarstva poljoprivrede, šumarstva i vodoprivrede.

Otvorena je rasprava.

U raspravi su sudjelovali: Ajman Šoše, Šerif Špago, Amir Šelo, G-đa Alikadić

Ajman Šoše u ime Kluba Bošnjaka u Skupštini HNŽ/K predlaže dva amandmana na Prijedlog Zakona o izmjenama i dopunama Zakona o poljoprivrednom zemljištu.

Amandman I- Članak 1, briše se, u Prijedlogu Zakona o izmjenama i dopunama Zakona o poljoprivrednom zemljištu HNŽ/K, i dodaje se novi članak 1 koji glasi: „u zakonu o poljoprivrednom zemljištu HNŽ/K, Narodne novine HNŽ/K, broj 8/13, u članku 4, stav 23, briše se tačka, zarez, stavlja se zarez, i dodaju riječi „stambeni, poslovni, sportski objekti i rekreacione zone“

Članak 2, u članu 31, stav 3, u devetom redu iza riječi „energije“, dodaje se tekst „kao i stambenih, poslovnih, sportskih objekata i rekreacionih zona“. Dosadašnji članak 2 Prijedloga Zakona o izmjenama i dopunama Zakona o poljoprivrednom zemljištu HNŽ/K, postaje članak 3, a članak 3 postaje članak 4.

Amandman II-U Prijedlogu Zakona o izmjenama i dopunama Zakona o poljoprivrednom zemljištu HNŽ/K, članak 4, se briše.

Predsjedavajući je zaključio raspravu.

#### **AD3. Prijedlog Zakona o izmjenama Zakona o administrativnim taksama sa tarifom administrativnih taksu HNK (skraćeni postupak)**

U ime predlagatelja Prijedlog Zakona o izmjenama Zakona o administrativnim taksama sa tarifom administrativnih taksu HNŽ/K obrazloženje je dao Rašid Hadžović, ministar Ministarstva obrazovanja, nauke, kulture i sporta.

Otvorena je rasprava.

U raspravi su učestvovali: Amer Zagorčić, Đuro Prkačin, Šerif Špago, Rašid Hadžović, Tomislav Martinović.

Poslanik Šerif Špago ulaže amandman i prilaže u pisanom obliku.

„Članak 1, u Zakonu o administrativnim taksama sa tarifom administrativnih taksi HNŽ/K, Narodne novine HNŽ/K broj: 2/13, tarifa kantonalnih administrativnih taksi, poglavlje IV, takse iz oblasti obrazovanja, nauke, kulture i sporta, mijenja se i glasi: poglavlje IV, takse iz oblasti obrazovanja, nauke, kulture, sporta, edukacije i licenciranja u saobraćaju“. Zatim slijedi „tarifni broj 13“.

Zastupnik Tomislav Martinović je uložio amandman u pisanom obliku, a odnosi se na samnjenje visine taksi.

Predsjedavajući je zaključio raspravu.

Predložen je slijedeći zaključak:

„Prijedlog Zakona o izmjenama Zakona o administrativnim taksama sa tarifom administrativnih taksi HNŽ/K, vraća se Vladi na dodatno usaglašavanje. Ostavlja se mogućnost zastupnicima da u roku od 3 dana dostave eventualne prijedloge amandmana na navedeni tekst zakona“.

Usljedilo je glasaovanje

Zaključak je usvojen većinom glasova, uz 3 glas protiv.

#### **AD5. Prijedlog Zakona o izmjenama Zakona o načinu označavanja i evidentiranja naseljenih mjesta, ulica, trgova i kućnih brojeva**

U ime predlagatelja obrazloženje je dao Ivan Lesko, direktor Uprave za geodetske i imovinsko-pravne poslove.

Otvorena je rasprava.

U raspravi su sudjelovali: Vesna Saradžić, Đuro Prkačin, Tomislav Martinović, Šerif Špago, Ivan Lesko.

Zastupnica Vesna Saradžić ulaže amandman,

U članku 1. umjesto „obavještenje“ trebalo bi da stoji „rješenje“. Potrebno donijeti rješenje u skraćenom ispitnom postupku, a amandman bi glasio: „Služba utvrđuje kućni broj u skladu sa odredbama članka 11 do 20 ovog zakona. Na osnovu utvrđenog kućnog broja služba izrađuje pisano rješenje koje se dostavlja vlasniku, odnosno korisniku zgrade ili građevinske parcele. Rješenje kojim se određuje kućni broj sadrži i oznaku katastarske čestice na kojoj je zgrada izgrađena, odnosno na kojoj se nalazi građevinska parcela, kao i visinu troškova označavanja zgrade i građevinske parcele brojem. Protiv rješenja iz stava 1 ovog člana može se podnijeti žalba drugostepenom organu, upravi za Geodetske i imovinsko-pravne poslove HNŽ/K-a, u roku od 15 dana od dana prijema rješenja“.

Usljedila je pauza od 10 minuta.

Nakon pauze Predsjedavajući čita prijedlog zaključka:

„Ustanovljeno je da su Prijedlog zakona koji je dostavljen u skupštinsku proceduru i onaj koji je usvojen na Vladi u različitim tekstovima“.

„Zadužuje se Vlada da do naredne sjednice Skupštine dostavi Prijedlog Zakona o izmjenama Zakona o načinu označavanja i evidentiranja naseljenih mjesta, ulica, trgova i kućnih brojeva, u tekstu kako ga je usvojila na svojoj sjednici“.

Usljedilo je glasaovanje.

Zaključak je jednoglasno usvojen.



Predsjedavajući obavještava prisutne da će izjašnjavanje o amandmanima na Zakon o poljoprivrednom zemljištu biti ostavljeno za sljedeću sjednicu, s obzirom da se Vlada HNŽ/K nije izjasnila o amandmanima na Zakon o poljoprivrednom zemljištu.

#### **AD6. Nacrt Zakona o zaštiti obitelji s djecom**

U ime predlagatelja Nacrta Zakona o zaštiti porodice s djecom obrazloženje je dala Janja Milinković.

Otvorena je rasprava.

U raspravi su učestvovali: Amer Zagorčić, Elmir Šator, Osman Macić, Stana Burić, Luka Faletar, Ajman Šoše, Janja Milinković, Šerif Špago, Osman Čatić

Poslanici iznose svoje primjedbe, prijedloge i mišljenja na Nacrt Zakona o zaštiti obitelji s djecom.

Predsjedavajući je zaključio raspravu.

Predložen je zaključak:

„Prihvata se Nacrt Zakona o zaštiti obitelji sa djecom kao dobra osnova za izradu prijedloga. Primjedbe, prijedlozi i mišljenja izneseni na raspravi dostavit će se Vladi HNŽ/K na razmatranje. Ostavlja se rok od 10 dana poslanicima da dostave dodatne prijedloge u pisanom obliku. U roku od 90 dana ministarstvo zdravstva, rada i socijalne zaštite HNŽ/K će provesti javnu raspravu o nacrtu zakona. Zaključak stupa na snagu danom donošenja, a objavit će se u Narodnim novinama HNŽ/K.“

Usljedilo je glasanje.

Predsjedavajući konstatuje da je zaključak jednoglasno usvojen.

#### **AD7. Nacrt Zakona o obrazovanju odraslih HNŽ/K**

U ime predlagatelja Nacrta Zakona o obrazovanju odraslih HNŽ/K obrazloženje je dao Rašid Hadžović, ministar Ministarstva obrazovanja, nauke, kulture i sporta.

Za riječ se javio Dario Pušić ispred Komisije za obrazovanje.

Predsjedavajući je otvorio raspravu.

Niko se nije javio za riječ.

Predsjedavajući je zaključio raspravu i predložio zaključak:

„Prihvata se Nacrt Zakona o obrazovanju odraslih HNŽ/K kao dobra osnova za izradu prijedloga zakona. Primjedbe, prijedlozi i mišljenja izneseni na raspravi dostavit će se Vladi HNŽ/K na razmatranje. Ostavlja se rok od 10 dana da poslanici u pisanom obliku dostave dodatne prijedloge. Zaključak stupa na snagu danom donošenja, a objavit će se u Narodnim novinama HNŽ/K“.

Usljedilo je glasanje.

Predsjedavajući je konstatovao da je zaključak jednoglasno usvojen.

#### **AD8. Nacrt Zakona o zaštiti prirode**

U ime predlagatelja Nacrta Zakona o zaštiti prirode obrazloženje je dao Zejnil Trešnjo, pomoćnik ministra za zaštitu okoliša.

Predsjedavajući je otvorio raspravu.

Niko se nije javio za riječ.

Predsjedavajući je zaključio raspravu i predložio zaključak:

„Prihvata se Nacrt Zakona o zaštiti prirode kao dobra osnova za izradu prijedloga zakona. Primjedbe, prijedlozi i mišljenja izneseni na raspravi dostavit će se Vladi HNŽ/K na razmatranje. Ostavlja se rok od 10 dana da poslanici u pisanom obliku dostave dodatne prijedloge. Zaključak stupa na snagu danom donošenja, a objavit će se Narodnim novinama HNŽ/K“.

Usljedilo je glasanje.

Predsjedavajući je konstatovao da je zaključak jednoglasno usvojen.

#### **AD9. Odluka o osnivanju Komisije za pitanje branitelja Skupštine HNŽ/K**

Predsjedavajući čita prijedlog Odluke o osnivanju Komisije za pitanje branitelja Skupštine Hercegovačko-neretvanske županije kantona Članak I,

„Skupština HNŽ/K na sjednici održanoj 16.12.2016. godine donijela je Odluku o osnivanju komisije za pitanja branitelja Skupštine HNŽ/K.

Osniva se komisija za pitanje boraca Skupštine HNŽ/K u sastavu:

1. Zijat Mušić, predsjedavajući;
2. Davor Pehar, zamjenik predsjedavajućeg;
3. Osman Macić, član;
4. Zoran Krešić, član;
5. Suad Muharemović, član ispred koordinacije temeljnih boračkih udruženja HNŽ/K;
6. Zoran Zovko, član ispred koordinacije braniteljskih udruga HNŽ/K.

Prijedlog Odluke zastupnicima je ranije dostavljen u materijalima za sjednicu Skupštine, bez imena članova.

Predsjedavajući je otvorio raspravu.

Niko se nije javio za riječ.

Predsjedavajući je zaključio raspravu.

Usljedilo je glasanje.

Prijedlog Odluke o osnivanju Komisije za pitanja branitelja Skupštine HNŽ/K je jednoglasno usvojen.

#### **AD10. Odluka o osnivanju Komisije za europske integracije Skupštine HNŽ/K**

Kolegij Skupštine predlaže Odluka o osnivanju Komisije za europske integracije Skupštine HNŽ/K.

Prijedlog Odluke poslanicima je ranije dostavljen u materijalima za sjednicu Skupštine.

Predsjedavajući je otvorio raspravu.

Niko se nije javio za riječ.

Predsjedavajući je zaključio raspravu.

Usljedilo je glasanje.

Predsjedavajući konstatuje da je Odluka o osnivanju Komisije za europske integracije Skupštine HNŽ/K, jednoglasno usvojena.

Sjednica je završena u 17:15 sati.

Zapisničar

Aida Dedić



Predsjedavajući

Šerif Spago

